

Festival di Tumba ta conta cu 41 cantante y 17 banda pa celebra Carnaval 60



ORANJESTAD -- Dia-domingo ultimo a tuma luga inscripcion pa e gran festival di Tumba pa Carnaval 60, cu sigur a demostra di tin un interes hopi grandi. Rincon City a keda chikito pa tur e participantenan, ya cu a hasta kibra record den participante. Un total di 41 cantante, tanto e Tumberonan di antes como varios nobo, hunto cu 17 banda a bini hunto na Rincon

City pa inscribi nan mes.

E inscripcion a bay den un hopi bon ambiente y e entusiasmo ta hopi halto y Aruba completo por spera un anochi di Festival di Tumba di kita sombre. "Nos ta bay wak con nos ta haci cu e ora, ya cu conhuntamente cu e bandanan, nos a dicidi pa tira lot e anochi ey di competencia mes, pa exactamente 7:00

y pa 8:00 cuminsa e festival cu e prome banda participante. Festival di Tumba di e aña aki ta priminti di bira uno hopi grandi, un anochi yena di musica, ritmo, sabor y competencia di nivel pa e titulo maximo di Rey of Reina di Tumba 2014," asina Luigi Rasmijn di e comision organisado a indica.

SAC ta contento cu e sosten y apoyo masal cu nos musiconan ta duna na nos gran celebracion di Diamanta y ta aprecia masha hopi mes nan participacion. E 17 bandanan pa e gran anochi aki ta: Zeta Band, Tsunami, Los Hijos del Sol, Upgrade Music, Solo Banda Show, The Failers, Tumberito Band, Oreo, Rincon Boys, Scol di Mu-



sica Rufo Wever, D'ilicious, Quality Sound, Papito y su Biba Lekker Band, Geo, Simplemente pabo, Grupo ta cla y Badu.

SAC ta gradici Rincon City, cu a pone e luga disponible pa e gran inscripcion aki tuma luga y tambe e sponsornan, cu ta esunnan cu ta haci e festival aki posibel: ATA, Setar, Balashi y Aruba Bank. Invitacion ta keda pa Aruba

completo, specialmente e carnavalistanan y e amantenan di bon musica di Tumba, bin disfruta di un dushi ambiente dia 1 di februari proximo, pa 8:00 di anochi na Entertainment Center. Ticket ta obtenibel caba na oficina SAC of tambe por cumpra na porta mes, pa solamente 25 florin, unda cu ta garantis pa tin un excelente ambiente, musica y Tumba. □